



**PRIMEIRO
MINISTRO**

**DISKURSU
SUA EXCELÊNCIA PRIMEIRU-MINISTRU
DR. RUI MARIA DE ARAÚJO
IHA OKASIAUN APRESENTASAUN PROPOSTA LEI
ORSAMENTU REKTIFIKATIVU 2015**

Parlamento Nacional, Díli
Loron 1 fulan Abril tinan 2015



Palácio do Governo,
Avenida Presidente Nicolau Lobato,
Díli, Timor-Leste

Sua Excelência
Señor Presidente Parlamentu Nasional

Suas Excelências
Vice-Presidentes Parlamentu Nasional

Suas Excelências
Señoras no Señores Deputados

Karos Kolegas
Señoras no Señores membrus Governu

Senhoras no señores
Povu Timor oan tomak,

Ho onra boot maka ohin hau diriji hikas, dala ida tan iha tempu ne'ebé badak, ba Sua Eselénsia Sr Prezidente, no ba distintu deputadu Parlamentu Nasional nian hotu, hodi apresenta Proposta Lei Orsamentu Retifikativu ba tinan 2015.

Orsamentu ratifikativu ba tinan 2015, kosubstansia forma ne'ebé Governu ida ne'e, hakarak atu ezejuta iha kurtu prazu, Programa Governu ne'ebé semana liu bá, distintu deputadu sira iha ona biban atu apresia, iha debate ida ne'ebé konstrutivu no demokratiku.

Programa VI Governu, programa continuidade, la'os deit tamba foo segmentu ba politika hirak ne'ebé governu anterior defini tiha ona, maibé mos tamba mai husi Planu Estratéjiku Dezenvolvimentu ne'ebe defini ita nia vizaun too 2030. Ida ne'e vizaun longu prazu ida, tamba ita hakarak atu transforma Timor-Leste, ba paiz ida ne'ebé iha rendimentu médiu-altu, ho populasaun ida ne'ebé prósperu, instruidu no saudável, tamba ita hatene katak, wainhira ita fortalese ita nia povu, ita fortalese moos ita nia Nasaun.

Governu hirak ne'ebé liu tiha ona, defini prioridade ba Timor-Leste no implementa ho susesu, politika no programa barak ne'ebé ohin hatu'ur ita nia paiz iha situasaun estabilidade sosial politika, no ita bele moris iha ambiente paz no seguransa. Ita labele nega katak ida ne'e fator krusial ba kresimentu ekonomiku no nasaun ninia dezenvolvimentu.

Tamba ita serbisu kedas ona iha prioridade, no ba prioridade hirak ne'e, ita atinji ona objetivu lubun ida. Ita hotu bele konfirma konkista hirak ne'ebé, iha tinan sanulu resin tolu nia laran, ita konsege alkansa nu'udar paiz independente.

Ohin ita iha populasaun ida ne'ebé moris estável, hakmatek, no seguru, no ita iha família ho poder konsumu ba bens no servisus ne'ebé boot liu tan, ne'ebé hetan aumentu ida serka de 38% entre 2007 no 2012. Apoiu ne'ebé Estadu foo ba konbatentes libertasaun nacional, no apoiu ba sira ne'ebé vulnerável liu, hanesan inan, feto-faluk, ferik no katuas, deficiente no labarik sira, kontribui ba rezultadu hirak ne'e, no sei kontinua sai nu'udar prioridade ba VI Governu.

Iha tinan hirak ikus ne'e, ita rejista moos, (1) aumentu husi labarik ne'ebé frekuenta eskola husi 66% iha 2007 ba 92% iha 2013; (2) husi 2001 to'o 2009 taxa mortalidade infantil no labarik menus husi tinan lima, tu'un liu 50%; (3) taxa malnutrisaun infantil tu'un husi 46% ba 38% husi 2001 ba 2013; Iha 2014 Organizasaun Mundial Saúde rekoñese esforsu Timor-Leste nian iha implementasaun Programa Nasional Kontrolu ba Malaria, wainhira ita atinji Objetivu Dezenvolvimentu Mileniu nian, ho insidensia malária menus husi kazu 1 iha 1000 habitantes.

Ne'e dadus estatistikus hirak ne'ebé hatudu melloria husi indicador sosial ita nia Paiz. Ita tenki orgullu tamba ita konsege alkasa rezultadu hirak ne'e.

VI Governu sei nafatin buka hakiak kondisaun baziku hotu, hodi halo diak liu tan, timor oan sira nia moris, no atu hamosu tipu rikeza sira seluk, ne'ebé la'os deit depende ba ita nia riku soin natural. Tamba ida ne'e, **ami hatene katak ita tenki produz barak liu tan, maibé ita presiza uluk hamosu kbiit atu produz.**

Fundu especial hirak ne'ebé estabesidu tiha ona, hanesan Fundu Infraestrutura no Fundu Dezenvolvimentu Kapital Umanu, kontribui atu mellora, kuantitativa no kualitativamente, infra-estrura essencial, no reursus umanus ne'ebé bele permiti hahu ona, ita nia nia objetivu atu diversifica economia.

Iha tinan 2014 ninia rohan, liu husi Fundu Dezenvolvimentu Kapital Umanu, ita iha ona bolsa estudu hamutuk 2800. Husi hirak ne'e, serka de 718 iha área edukasaun no 1600 iha área saúde, ne'ebé sei kontribui atu dezenvolve sector determinante hirak ne'e ba ita nia nasaun. Planu integradu ba dezenvolvimentu infraestruturaz bazika, ne'ebé inklui konstrusaun rede rodoviária, sei fundamental tebes atu aumenta sector produtivu ita nia rain nian.

Iha tempu hirak liu ba, iha ona melloria significativu iha asesu ba elektrisidade. Iha tinan 2007, familia sira ne'ebé iha asesu ba elektrisidade iha deit 22%, maibé iha tinan tinan 2014 aumenta ba 71%. Programa elektrifikasaun iha pais, ho tan konstrusaun sentral elektrika foun rua, sai hanesan investimentu boot ida husi Estadu ne'ebé buka atu hamosu jerasaun, transmisaun no distribuisaun elektrisidade ba teritoriu tomak, ba sidadaun sira nia benefisiu, no mos ba dezenvolvimentu empresa no industria. Oras ne'e, halao hela dadaun tan, konstrusaun sentral elektrika ida iha Oe-cusse, ne'ebé sai hanesan infra-estruturaz fundamental ba rejiaun ida ne'e.

Taxa kresimentu ekonomiku serka de 12,5% kada tinan, entre 2007 no 2011, no serka de 7% iha tinan tolu ikus liu, sei la sai nu'udar buat ida ne'ebé possível, se la iha reforma importante iha jestaun finanças publikas, no iha montante osan ne'ebé investe ona iha Paiz ida ne'e. Entidade hirak hanesan Kamara Komersiu no Industria, Ajensia Espesializada Investimentu, Balkaun Uniku Serve, no Banku Komersial Timor-Leste sei kontinua dezenvolve hodi apoia sector empresarial, inklui empresa mediu no ki'ik-oan sira, koperativa no grupu industrial no komersial.

Excelência, Senhor Presidente

Excelências, Senhores Vice-Presidentes
Excelências, Senhores Deputados,

Maski nune'e ita moos tenki rekoñese katak se ita halo buat barak ona, buat barak seluk moos, ita seidauk halo. Ita sei presiza lao dalan ne'ebé naruk, atu ita nia labarik sira hotu bele frekuenta eskola no hetan nutrisaun di'ak. Atu sidadaun sira hotu bele hetan asesu ba servisu no ba beins ne'ebé bele foo vida ida ne'ebé dignu liu tan, ba sira. Dalan sei naruk molok atu ita alkansa ita nia aspirasaun ba kresimentu ida ne'ebé diversifikadu, inklusivu no sustentável.

Atu ida ne'e bele akontese, essencial tebes investimento iha sector oi-oin. Investimentu ida ne'ebé tenki ponderadu eh hanoin didiak, ekilibradu no transversal. VI Governu empenadu tebes iha kresimentu no diversifikasaun iha ita nia economia, hodi bele hases-an husi dependência ba Fundu Petroleu.

Hafoin, se ita iha ona roteiru atu alkansa objetivu ida ne'e, ne'ebe descreve ona iha Planu Estratéjiku Dezenvolvimentu, ho detalles kona-ba programa no politika atu atinji vizaun dezenvolvimentu, kabe ba VI governu atu akresenta ba eransa ida ne'e, dinamika atuasaun foun ida. Dezafiu ne'ebé mosu ba VI Governu maka oin-sa atinji efisiensia boot liu iha implementasaun investimento, no ezekusaun programa, liu husi alkasa rezultadu barak liu iha sector produtivu, no exige prestasaun servisu publiku ne'ebé diak liu iha sector publiku no sector privadu, atu nune'e, despeza publika hotu bele hamosu rendimentu seluk, no despeza publika ida ne'ebé, kordenadu no transparente.

Señora no señor sira,

Planu Estratejiku rekoñese katak presiza iha etapa inicial ida ba dezenvolvimentu, iha ne'ebé sector publiku maka hamriik iha oin. Iha etapa ida ne'e, despeza publika sei aumenta, hodi konstroi infraestrutura essencial, no sector publiku maka sei conduz kresimentu ekonomiku. Timor-Leste konsege dezenvolvimentu ida ne'e, ne'ebé sector publiku conduz, entre 2008 no 2012, hodi aumenta liu husi dalarua, investimento publiku iha periudu ida ne'e. Ida ne'e kontribui ba taxa kresimentu ekonomiku ne'ebé elevadu tebes, maski kresimentu ida ne'e konsentradu iha reforma administrasaun publika no iha sector konstrusaun sivil.

Maibé ida ne'e foin maka etapa dahuluk husi dezenvolvimentu atu bele kontribui hodi hametin kapasidade atu produz. Iha longu prazu, Governu labele kontinua conduz kresimentu liu husi aumentu signifkativu ba despeza publika, tamba ida ne'e bele hamohu Fundu Petroleu. Ita tenki hakat liu ba etapa ida tuir mai, ne'ebé sector privadu maka hamriik iha oin, ne'ebe moos sector agricultura, turismo no industria petrokimika buras no foo fatin ba economia produtiva ida, iha ne'ebé ema iha kbiit liu tan, atu serbisu no produz bens.

Hau hakarak atu salienta iha ne'e katak oras ne'e, ita hakat dadaun ona iha tranzisaun ida ba segunda etapa dezenvolvimentu, ne'ebé signifika taxa kresimentu PIB

naun-petrolifero sei tu'un, maibé kresimentu ekonomiku sei iha kualidade diak liu, tamba razaun hanesan tuir mai ne'e:

- i) Kresimentu ekonomiku husi sector privadu sei boot liu, iha setor produtivu. Ezemplu ida maka akordu ne'ebé asina ho Heineken, ho investimentu ida ho valor 40 milloes, ne'ebé bele hamosu 200 postus traballu diretu no 800 postus traballu indiretu.
- ii) Inflasaun sei kontinua ki'ik, no sei iha nível inferior liu, husi hirak ne'ebé rejista tiha ona, hodi mantein previzaun atu labele ultrapassa 4% too 6%, buat ne'ebé bele representa aumentu iha poder kompra sidadaun sira nian, no kontribui ba redusaun pobreza. Ida ne'e benefisiu ida ne'ebe sei iha moos refleksu iha investidor sira, tamba sei hamosu kustu ne'ebé ki'ik ba empresa, no Timor-Leste bele sai kompetitivu liu tan, no bele aumenta investimento no exportasaun.
- iii) Konsumu mediu husi família sira sei nafatin buras. Konsumu ida ne'e forma ida ne'ebé diak liu atu sukat nível vida nian, kompara ho PIB naun petroliferu.
- iv) Rezultadu husi kresimentu ekonomiku bele partilla entre timor oan barak liu tan, no sei la konsentra deit iha Dili, hodi nune'e bele kombatate desigualdade.

Tamba ne'e, maski kresimentu ekonomiku bele ki'ik, maibé sei sustentável liu, no ema nia nível vida sei dika liu. Governu anterior, wainhira diminui 13% iha orsamentu 2015, kompara ho orsamentu 2012, rekoñese katak Timor-Leste la'o hela dadaun ona ba segunda etapa ne'ebé hau descreve iha leten, hodi tau iha pratika politika fiscal konservadora ida, hodi koa orasmentu, em vez de aumenta.

VI Governu empenhadu atu kontinua tendensia ida ne'e. Nune'e, **ami sei la aumenta nível despeza publika, no halo aposta iha ekonimia ida ne'ebé iha kualidade di'ak liu, no sustentável.**

Excelência, Senhor Presidente
Excelências, Senhores Vice-Presidentes
Excelências, Senhores Deputados,

Governu empenhadu atu halo investimento publiku eficiente liu tan. Ida ne'e signifika la aumenta despeza publika iha mediu prazu, bo buka atu mellora prestasaun servisu. Distintu Deputadu sira bele husu: "oin-sá imi bele halo ida ne'e?"

Pasu primeiru maka orsamentu retifikativu ida ne'e, ne'ebé reflète estrutura governu ki'ik liu husi governu anterior, no iha mekanismu kordenasaun ne'ebé diak liu entre ministério. Buat hirak ne'e sei aumenta efisiensia iha despeza publika, no sei bele mellora prestasaun servisu.

Pasu segundu maka revizaun ba despeza. Ami sei revê item ida-idak, iha liña no programa despeza husi governu nian, no ami sei hamenus despeza hotu ne'ebé supérfluo. Revizaun

hirak ne'e preziza análise detalladu, labele ansi, no sei halao iha tinan finanseiru tomak, no rekomendasaun ne'ebé mosu husi analize ida ne'e, sei informa prosesu OJE 2016.

Excelência, Senhor Presidente,
Excelências, Senhores Vice-Presidentes,
Excelências, Senhores Deputados,

Proposta Lei Orsamentu Rectifikativu 2015 ne'ebé apresenta ohin, mantem, no laiha alterasaun, ho total **1.570.000 milhoes de dolares**. Investimentu ida ne'e, sei finansia liu husi reseita domestika, husi Rendimentu Sustentavel Estimadu Fundu Minarai nin, hamutuk levantamentu em esesu, husi Rendimentu Suatentavel Estimadu. Saldu osan no emprestimu sira la iha alterasaun husi orsamento 2015 nian.

Orsamentu Retifikativu ba 2015 sei hatan liu ba estrutura governamental foun, ho administrasaun ida nebe sei fokus liu ba prestasaun servisu no rezultadu servisu, no ba ejijsia Governu ida ne'ebé hakarak halo buat diak liu tan, hodi investe maibé evita gastu supérfulo, hodi nuné'e, bele hetan kresimentu ekonomiku ho qualidade diak liu.

Ita hatene katak, atu halo implementasaun politika Governu nian, esensial liu maka iha kordenasaun diak husi ministeriu hotu-hotu. Govenru ida ne'e kompostu moos husi **Ministru Estadu Kordenadores foun tolu**, respetivamente ba kordenasaun iha sektor sosial, ekonomiku no administrativu, no hamosu tan **Ministeriu ba Planeamentu no Investimentu Estratéjiku**. Ne'e pasu efektivu ba dahuluk, dalan ba efikasias no ba responsabilizasaun Governu nian hodi implementa estratejia dezvoltamentu ho ejijsias no rigor. Nune mos, **Ministru Estadu iha Presidencia Konsellu Ministru**, hetan tan kompetensia, hodi sai hanesan responsavel ba kordenasaun iha preparasaun no ba reforma iha sector justiça.

Orsamentu Estadu agora dadaun ne'e, redus konsideravelmente dimensaun Governu nian, maibe aumenta subtansialmente ninia organisazaun no efikasias. Ami nia **reformas**, inside iha metodu ida ne'ebé diak ba implementasaun no ezekusaun, laos ba iha konteudu programatiku sira, maibé hanesan continuidade ba metas longo prazu. Nune'e ami sei:

- Hadia kordenasaun ho ministeriu hotu hotu;
- Fortalese planeamentu ba longo prazu no fortalese relasaun kustu-kualidade ida ne'ebé diak;
- Halo redusaun ba kompleksidade no dimensaun administrasaun publika nian, hodi nuné'e bele sai eficiente no sustentavel liu. Ne'e inklui responsabilidade no responsabilizasaun boot servidor publiku sira nian, no revizaun klean liu ba nesesidade, kontratasaun no promosaun funsaun publika sira nian.
- Halo armonizasaun leis, atu bele iha ordenamentu juridiku ida ne'ebe diak, no hanesan ho timor oan sira nia nesesidade, hodi bele promove mos asesu ba justiça, no promove serteza juridika ba investidor potensial sira.

Ministro Estado iha Presidencia Konsellu Ministru ne'ebé koadjuva Primeiru Ministru iha Presidencia Konsellu Ministru, no iha kordenasaun Governu, sei moos kordena reforma ba iha sektor justisa no uniformizasaun lei. Ba ida ne'e preve ona orsamentu foun ida ho total **400 mil dolares**. Agora dadaun total orsamentu ne'ebé atribui ba Presidencia Konsellu Ministru hamutuk **137,7 milhoes de dólares**. Maioria orsamentu ida ne'e, destinadu ba transferensia publika ba Autoridade Administrativa Especial Oe-cusse Ambeno no Zona Especial Ekonomia Social Merkadu Oe-cusse Ambeno no Atauro.

Ministro Estado, Kordenador Asuntu Sosial iha responsabilidade hodi kordena no implementa politika sosial ne'ebé eficaz, ho objetivu atu hadiak prestasaun servisu no asesu ba bens indispensaveis ba desenvolvimentu umanu. Ne'e ejije kordenasaun ida ne'ebé diak iha ministério sira iha area saúde, edukasaun, formasaun profesional no solidariedade sosial. Orsamentu ba Ministro Estado ida ne'e hamutuk **1,9 Milhoes de dolares**.

Sektor ekonomiku krusial tebes ba desenvolvimentu Timor-Leste nian, no ejije kordenasaun diak, iha area ida ne'e, husi **Ministro Estado, Koordenador Asuntu Ekonomiku**. Orsamentu ba area ida ne'e hamutuk **5,3 milhoes dolares** atu utiliza hodi promove impulsu boot liu iha sektor agrikola, turismu, komersiu no industria, no mos iha desenvolvimentu area emprezarial.

Ho orsamentu besik **2 milhoes de dolares**, **Ministru Estado, Kordenador ba Asuntu Administrasaun Estado no Justisa**, sai responsavel ba governasaun ida ne'ebé sólidu, demokrátiku no efikaz, iha Estado ninia rekursus hotu, liu husi fortalecimento ba instituisaun estatal sira. Prosesu descentralizasaun administrativa no projetu atu hamosu munisipiu, iha Ministro ida ne'e nia kordenasaun, sei sai hanesan faktor fundamental ba distribuisaun ne'ebé justu husi rekursu publiku, no asesu ba servisu iha area rural no remota sira, hodi nune'e bele kombate ba dezigualdade.

Pais hirak ne'ebé iha planu ekonomiku detalladu ba longo prazu no espesifikadu liu, sei dezenvolve lais liu kompara ho pais sira seluk. Governu sei dezenvolve politika ne'ebé detalhadu no integradu liu, ho detalles iha kustu no prioridade ba projetu fiziku hotu-hotu, hodi nune'e bele implementa lais liu, ho qualidade no kustu ne'ebe diak liu. **Ministeriu foun ba Planeamentu no Investimentu Estratejiku**, sei iha orsamentu ho total **76,5 milhoes de dólares**, hodi bele alkansa objektivu sira ne'e.

Mekanizmu ida ne'e foo possibilidade atu jere diak liu tan siklu investimentju integradu, ne'ebé projetu boboot infra-estrutura proposto ona, analizadu, orsamentadu, consebidu, aprovisionadu, avaliadu no fiskalizadu. Ida ne'e permiti efisiensia ba investimentu ne'ebe boot iha sektor ida ne'e, ne'ebé sai hanesan espina dorsal ba ita nia desenvolvimentu. Iha mos kontestu ida ne'e, Ministeriu Planeamentu no Investimentu Estratejiku sei halo avaliaun no revizaun ne'ebé klean ba programa PDID no PNDS hodi bele iha proporsionalidade ida ne'ebé diak, husi kustu no rezultadu, no bele sai satisfatoriu no sustentavel.

Finalmente, no tamba ita konsidera katak sektor defeza no seguransa fundamental tebes iha Estadu Direitu Demokratiku ida, hau sei la haluha mensiona kriaun **Ministeriu Interior no Ministeriu Defesa**, ho divizaun funsaun no responsabilidade ne'ebé diak liu hodi bele tau matan ba ita nia seguransa interna no fo protesau ba ita nia soberania.

Paz ho estabilidade sai nafatin prioridade ida ba Governu. **Operasun ba estabilidade nacional hetan suporte ho 2 milhoes de dolares**, ne'ebé aloka iha kategoria dotasaun todo o Governu, ho vizaun ida katak se laiha paz no seguransa, ita labele inspira konfiansa ba investidor sira, no konfiansa iha povu timor oan rasik.

Excelência, Senhor Presidente,
Excelências, Senhores Vice-Presidentes,
Excelências, Senhores Deputados,

Hanesan hau hato'o tiha ona katak, orsamentu retifikativu la altera orsamentu husi Fundu Konsolidadu Timor-Leste nian, komparativamente ba Orsamentu Estadu orijinal 2015. Iha duni alterasaun husi kategorias dotasaun nian, husi montante ne'ebé poupa ho optimazasaun Governu nian, sei utiliza ba medida politika importante ne'ebé foun, no sistematizadas ho forma mak hanesan tuir mai ne'e :

- Saláriu no Vencimentus, diminui 1,5 milhões de dólares ba **177,5** milhões.
- Bens e Servisus, aumenta 0,7 milhões dólares, ba **515** milhões.
- Transferências Públicas, diminui 4 milhões dólares, passa ba **454,4** milhões.
- Kapital Menor, aumenta 3,4 milhões dólares, passa ba **31** milhões.
- Kapital Desenvolvimentu, aumenta 1,5 milhões de dólares, passa ba **391** milhões.

Husi medida foun hirak ne'e, hau hakarak destaka aumentu orsamentu ba **Autoridade Região Administrativa Especial Oe-cusse Ambeno, no moos ba projecto-piloto Zona Especial de Economia Social e de Mercado de Oe-cusse Ambeno e Ataúro**, ne'ebé sei iha mos transferensia adisional ho valor 51,5 milhoes de dolares, hodi hamosu total orsamentu hamutuk **133,4 mihoes de dolares**. Ba projetu desenvolvimentu integradu ida ne'e, ne'ebé lidera husi Dr. Mari Alkatiri, no ita hotu despozita ita nia konfiansa total, krusial tebes atu finansia dezvoltimentu infra-estrutura basika no kondisaun sira seluk, hodi sai hanesan motor aranke ba kresimentu ekonomiku no sosial iha rejiaun ida ne'e. Iha programa ida ne'e, inklui mos **1,5 milhoes** hodi halo **selebrasaun tinan 500 Portugueses sira to'o iha Timor-Leste**. Selebrasaun sira ne'e sei marka presensa konvidadus internacional sira, hodi nune'e bele kontribui ba dinamizasaun no kresimentu rejiaun ida ne'e nian.

Koperasaun ba dezvoltimentu, sai hanesan componente forte ida ba ita nia politika esterna. Ita nia istoria foo hanoin hikas ita katak ita sempre konta ho amizade, ajuda no solidariedade husi pais sira seluk. Timor-Leste moos hakarak atu partisipa iha dezvoltimentu povu irmãos sira seluk nian, hanesan República Guine Bissau. Ho hanoin atu kontinua reforsa tan sektor defeza no seguransa ne'ebé krusial ba estabilizasaun no dezvoltimentu pais ida ne'e nian, **Agensia Koperasaun Timor-Leste**, hetan orsamentu

4,5 milhoes de dólares, atu hala'ó serbisu ida ne'e, no koperasaun bilateral sira seluk moos.

Governu kontinua ho nia kompromissu hodi halo dignifikasaun, omenajen no apoiu ba **Kombatente Libertsau Nasional**. Iha orsamentu retifikativu ida ne'e, iha mos hanoin ida hodi halo provizaun ba kustu operasional Konsellu Veteranu sira nian, ho valor **250 mil dolares amerikanu**, hodi estabese Konsellu Nasional ba Kombatente Libertsau Nasional. Aloka mos orsamentu ho total **150 mil dolares amerikanu** hodi finansia programa interkambiu husi Veteranu Timor Leste ho Australia.

Ikus liu, iha ambitu **boa governasaun**, no tanba ita konsidera fundamental reforma iha administrasaun publika, iha ona alokasaun **300 mil dolares** iha Gabinete Primeu Ministru, hodi hahu prosesu hadiak efikasias no efisiensia Funsau Publika. Hafoin ho **500 mil dolares**, ami mos sei hahu dezenvolve politika no programa servisu informasaun no teknolojia komunikasaun Governu nian, hodi fasilita "Governu Elektroniku", no ikus liu bele fasilita moos partisipasaun ativa no responsavel sidadaun sira nian iha prosesu dezenvolvimentu no prestasaun servisu, liu husi internet.

Excelência, Senhor Presidente,
Excelências, Senhores Vice-Presidentes,
Excelências, Senhores Deputados,

Iha kontestu ne'ebé hau deskreve tiaona, maski ita labele lakon ambisaun atu ensera tinan finanseiru ho ezekusaun orsamental ne'ebe as, maibé importante liu maka ita tenki ezekuta ho kualidade no bele fo benefisiu ba timor oan hotu hotu. Nune, wainhira bele, ita tenki ultrapassa 91,6% husi ezekusaun orsamental ne'ebé hala'ó iha 2014, maibé ho kualidade ne'ebé diak.

VI Governu Konstitusional preparadu atu hasoru desafius ne'ebé pais ida ne'e enfrenta, no atu implementa politika fiskal sustentavel no despeza publika ida ne'ebé koerente, ho ida ne'ebé planeadu tiaona, hodi reduz desperdisius no aumenta rezultadu ne'ebé bele sukat no iha kualidade. Liu liu iha momentu ne'ebe minarai folin tun, no ekonomia hanesan ita nian sai vulnerabel, diversifikasaun ekonomika tenke komesa manan dinamika foun, liu husi investimentu ne'ebé inteligente iha sektor hotu-hotu, hodi nune'e, bele konstitui mais valia ba Timor-Leste no moos ba aumentu reseita domestika.

Molok atu remata, hau sei la haluha salienta espiritu koperasaun husi distintu deputadu sira hotu ne'ebé, liu husi komisaun eventual, halao serbisu ho fleksibilidade boot tebes iha apresiasaun inicial ba proposta orsamentu retifikativu ida ne'e, hodi bele halo lais liu tan serbisu, maibé la compromete rigor no efikasias iha prosesu apresiasaun ba orsamentu ida ne'e.

Hau fiar katak debate ida ne'ebé ita hahu ohin, sei nafatin konstruivu no demokratiku, tamba ita hotu fiar metin katak, ho empenamentu ita hotu nian, ita sei alkansa dezenvolvimentu sustentadu no ekilibradu ba ita nia pais. Ida ne'e maka ita nia kompromisu ba Povu Timor-Leste no ba Ita nia Nasaun.

Obrigadu wain.

1 de Abril de 2015

Dr. Rui Maria de Araújo